

Min Pépère qu'j'ai querre

Té n'vas pet-ête pon em croire mais in dirot qu'in est arvenu in mille neuf chint dich' huit aveucq el grippe espagnole mais ach't'heure ch'est putôt inne grippe asiatique et i z' appell' tent cha el Covid 19 et i li ont même artrouvé des éfants in ~~T~~ngleterre, au Brésil et in Afrique du Sud.

Cha fait autint d'ravache qu'el gaz moutarde et chès gins dins l'monte i tomb'tent comme à Gravelotte. Té tousses, té t'étoques, t'arrives pu à respirer et pis après dins l'pire des cas té meurs. Si t'in réchappes, t'es toudis mate et parfos té perds l'odorat et ch'goût.

Bin sûr chès médecins, chès professeurs, i z'ont caché inne solution, d'nouveaux medicaments mais pour l'instint i' z'ont incore rin trouvé à part des vaccins mais i' in'n'a pon pour tertous ; chès pays qui les frabriqu'tent i' z'ont tindince ach' les garder pour eusses.

Alors in a tout'inne panoplie ed'gestes barrières à respecter. In dot mette des masques mais pon comme ti dins chès trinchées ; i'z'appell'tent cha des masques chirurgicaux et i'ne dure'tent que quatr'heures. I a aussi des masques in tissus et certains s'amus'tent à les décorer ; ch'est bellot tout plein et même parfos cha fait sourire. Mais té sais l'in ou l'aute i sont pon confortapes et j'enne ~~té dit~~ *pon* comme in a caud là d'sous. Après cha té dos souvint ét laver les mains so aveucq d'el zièpe so aveucq du gel hydro-alcoolique. I a incore el distanciation ; in a pu l'drot ed s'imbrasser, ni ed se serrer el main. In pus i faut toudis qu'i a deux métes (avant ch'étot un) intre ti et tin voisin. Té dos ét mouquer dins in mouquoir in papier et après el jeter. Té dos aussi éternuer dins tin coute.

Mais tout cha, chan' suffit pon toudis et i' z'ont invinté el confinement. J'vas t'expliquer : té dos rester l'pu possipe infermer dins t'mason : comme cha té vos personne et ch'virus i circule moïnse. In pus d'ech confinement i' z'ont arsorti comme in quarante tros ech couvre-feu : t'as pu el' drot ed sortir ed chès ti ed dix-huit heures à six heures el lind'main matin.

Cepindint i a incore pire. I'z'ont fermé chès estaminets et chès restaurants. Ti qui m'disos souvint qu'té préféros inne tchiote capelle à inne grinte cathédrale, eh bin té s'ros bin malheureux car comme chès églisses restent ouvertes t'auros pu qu'ed l'ieau bénite (d'el vraie) à boire.

Té vos pépère ch'est pon vramint gai mais j'sus quind même fin Bénache ed' t'avoir écrit tout cha, même si té n'el lira jamais ti qui est là haut dins chès ciux.

Cha m'a fait du bin ed té dire tout cha, j'em sins miux mais ti qui disos toudis in parlant dech mauvais tims : qué tims ed brin, qué brin d'tims j'ai bin invie ed t'imiter et dire in parlant ed 2020 : qué énée ed brin, qué brin d'énée. Et si cha continue ej' cros que cha s'ra parel pour 2021 ; cha s'ra es jumelle

J'pinse bin à ti, ve~~lle~~le sus mi,

Tin tchiot garchon qui t'a toudis querre.

Lexique

arvenu : revenu

ravache : ravage

té t'étoques : tu t'étouffes, tu t'étrangles

mate : fatigué

bellot : joli

té dos : tu dois

ziëpe : savon

mouvoir : mouchoir

mouquer : mouchoir

coute : coude

chan' : cela ne

bénache : content, heureux

velle : veille

querre (qui t'a toud's) : qui t'aime toujours.

Gravelotte : bataille en 1870 entre les Français et les Prussiens.